



# REPULSA ANTE RECORTES ANUNCIADOS POLO MINISTRO WERT

Sindicato de Traballadoras e Traballadores do Ensino de Galiza

## O STEG manifesta a súa absoluta repulsa aos recortes anunciados polo ministro Wert en educación

O sindicato urxe ao Conselleiro a que aclare canto antes se ten a intención de manter os recursos destinados a educación e non castigar máis cos recortes á escola pública, ou se pola contra acatará as instrucións de Madrid pese ás consecuencias desastrosas que sen dúbida terán para a calidade educativa. Desde o STEG demandamos ao goberno galego que non continúe coa súa política de recortes de educación, xa que se deterioraría a calidade educativa considerablemente, hipotecando o futuro das xeracións máis novas.

- Obrigar ao profesorado a asumir ata un 20% máis de alumnado, xunto cun aumento de horas docentes- que en secundaria e entre os mestres especialistas en primaria implica un aumento dos grupos que imparte cada docente, é dicir, outro aumento de alumnado- supón condenar ao fracaso académico a aquela parte das alumnas e alumnos que precisan maior atención e que non a recibirán porque, literalmente, non haberá de onde sacar o tempo para o facer. **Dito doutra maneira, é un xeito de introducir o “copago” na educación pública: quen teña dificultades nalgunha materia e a súa familia poida costearse clases particulares, terá unha oportunidade de as superar; quen non, engrosará as abultadas cifras do fracaso escolar.**

Esta medida suporía, ademais, o despedimento de centos de interinas e interinos que están a completar actualmente as plantillas fixas dos centros educativos, así como precarizar aínda máis as condicións laborais dos que non vaian ao paro. A eliminación practicamente total do profesorado interino e substituto que se podería chegar a dar, e a nova reestruturación da planificación dos centros (grupos e cadros) pode traer consigo unha remexida xeral de amplos sectores do profesorado que hoxe teñen praza definitiva nos seus centros e que se verían desprazados. Xa que logo, imos asistir a un final de curso convulso pola situación de incerteza que se vai dar nos cadros dos centros educativos e moito máis pola ameaza de que centos, mesmo máis de mil persoas se queden sen traballo.

- **A medida relacionada coa non cobertura das baixas por enfermidade de ata 15 días**, temos a certeza de que a Xunta a aplicará, como xa viña facendo. Sen embargo a norma aprobada en Madrid ten moita importancia: **consagra como “normal” unha situación indignante.**

- Aprazar o aumento a 2000 horas de todos os ciclos de FP supón unha retroceso claro na formación do alumnado – coa reforma agora paralizada, de tres trimestres lectivos pasaríase a cinco- e polo tanto na mellora da “competitividade” da que, segundo nos din, andamos escasos no mercado laboral. **A implantación da nova FP parálizase unha vez máis**, o que demostra a incontinencia verbal dun ministro que se desdice do anunciado fai escasas datas, o que non parece de recibo por moito que se queiran xustificar lembrándonos que vivimos unha “situación excepcional”.

- **Eliminar as dúas opcións de Bacharelato en todos os centros educativos**, suporía, nos centros educativos do rural galego, unha clara discriminación do alumnado ao obrigalo a se desprazar, de puiden, a centros mesmo doutras localidades nos que se imparta a opción que debe, obrigatoriamente, cursar para poder optar aos estudos posteriores que desexe. Unha proba máis de cómo os recortes afondan nas desigualdades de partida e non se trata dunha mera xestión eficiente sen consecuencias para a igualdade de oportunidades, como nos queren facer crer. **De ir esta medida acompañada da eliminación de bolsas para o transporte (quen pon a man no lume a que isto non vai pasar?), impediría ao alumnado de sectores máis desfavorecidos acudir aos centros de ensino onde se imparta a súa opción de bacharelato.**



# REPULSA ANTE RECORTES ANUNCIADOS POLO MINISTRO WERT

Sindicato de Traballadoras e Traballadores do Ensino de Galiza

- **Conxelar ou reducir os complementos salariais do profesorado** suporía castigar máis a un colectivo ao que xa se lle ten aplicado unha rebaixa salarial considerable, o que unido ao deterioro do labor docente que implican as outras medidas anunciadas, tería unhas consecuencias previsiblemente desastrosas sobre a moral do profesorado.

Ante esta situación de emerxencia dos servizos públicos é necesario que tomemos conciencia de que estes recortes e perdas de dereitos para o conxunto da sociedade **non son medidas de carácter temporal, como nos din; veñen para se quedar e converter os servizos públicos en algo residual, promovendo as privatizacións e as formas de financiamento mixto, coñecido como "copago", á que deberíamos denominar "repago", porque son servizos que xa pagamos cos nosos impostos.** Fronte a esta situación, esiximos ao Goberno Central e ao da Xunta que persigan a fraude fiscal e non propicien amnistías, que paguen máis os que máis teñen, xa que os recortes do público non só destrúen emprego, senon que xeran pobreza e exclusión social, incrementando a inxustiza e a perda de calidade democrática que estamos a padecer.

Ante a proximidade das eleccións galegas podería suceder que o goberno da Xunta decidise agardar os resultados antes de aplicar as medidas máis drásticas, pero a calificación por parte do Conselleiro das mesmas como "medidas valentes" non dá moitas esperanzas sobre un hipotético "plante" a Madrid a medio prazo. De persistir a Consellaría na súa política de recortes, desde o STEG faremos un chamamento a toda a comunidade educativa para se mobilizar ata os deter.

Desde o STEG apoiaremos, ademais, as mobilizacións contra os recortes en educación a nivel estatal, tanto por un elemental sentido da solidariedade con outros pobos, como polo feito de que o que se aplica - á baixa-noutras comunidades, máis cedo que tarde nos vai chegar a nós...

**Secretariado Nacional do STEG  
16 de abril de 2012**